

# QVÆSTIO MEDICA

## CARDINALITIIS DISPVATIONIBVS MANE DISCVTIENDA

### IN SCHOLIS MEDICORVM DIE IOVIS XXI. MART.

M. PETRO PERREAV Doctore Medico, & Chir. Profef. Præfide.

1083

*An Melancholicis Venus?*

**S** IBI naturæque iniurius est, qui de sua sorte queritur: stultus quidum cæteris longo præstat interuallo, omnium se infimum iudicat. Homo cælestium & elementarium particeps iucundo amboꝝ nexu felix perfruitur. Corpus obtinet tanto adornatum artificio, vt perfectius neque sit in natura, neque animo fingi possit. Summam eius dignitatem commendant structura & temperies: illa sublimis & recta patriæ nostræ memores esse iubet, quam intueri semper iubet; hæc vt inter omnes media, sic præstantissima, sic exacta cæterarum omnium mensura: vtræque ad actionem conducit, sed suo vtræque modo: structura vt ortu nobilior, sic nobiliorem sibi in actione partem vindicat. Actionis parens primumque principium anima est, quæ structura vtitur & temperie tanquam propriis instrumentis: hæc quamdiu in corpore habitat, quasi alta mersa caligine, nihil habet à se, est instar tabulæ rasæ, in qua nihil actu descriptum est; res circumiectas per sensus, tanquam per fenestras intuetur, ab ipsisque ita pender, vt eorum ope destituta, quasi obscurissima nocte circumfusa, in perpetuis futura esset tenebris, cæcæque rerum omnium ignorantie. Hæc spectra rerum atque idola hauusta à sensibus sinu suo recondit, speculatur, variè inter sese connectit, functionesque profert quæ nihil cum sensibus commune habent: cælestium & immutabilium ardentissimo flagrans desiderio, caduca & incerta omnia sabter se habet; his occupari quidem potest, satiari non potest, capacem enim Deo animam quidquid Deo minus erit non continebit.

**Q** VANQVAM verò anima ex se pura sit & immortalis, dum corpus induit conditionem mutat, sit quoque, vt corporis, sic & morborum ipsius socia: huius ad nutum totam se accommodat, coque tantum inclinatur, quo trahit corporis natura & temperamentum. Quod sit, sitque tali modo affectum corpus, hoc habet ab elementis, ex quibus vniuersa partium omnium compages exurgit. Stulti qui vnicum putant elementum, homo enim nequitiam doleret, neque enim esset à quo doleret. Sed magis desipiunt, qui infinita inuicunt: Quid enim magis ridiculum est, quam finito, imo exiguo corpori, infinitas partes tribuere? Apagere ergo vis illa & turbulenta concursio atomorum immutabilium, & per inane reuera volitantium. Rectè quidem qui quatuor elementis, igne, aëre, aqua, & terra coagmentatum corpus existimant: his rerum omnium primordiis, sursum deorsum vltro citroque permeantibus, mira sanè vicissitudine, mundi natura continuata est: his firma stabili in corpore concordia perfruentibus, inculcata felixque in æuum conferuatur sanitas: quod si horum conspiratio, mirandumque interpelletur commercium; morborum numerus irruit innumerus, fortuna, casus, elementarium, imò & cælestium omnium, homo lusus est; itavt, ad tuendam hanc adeo incertis nixam fundamentis vitam, tota vita discendum sit viuere.

**E** X Elementis inuicem mixtis temperamentum emergit; rarò quidem ad pondus, sæpius ad iustitiam, sæpius, modò ad hanc, modò ad illam inclinans qualitatē. Hinc pro vario qualitatum dominio, varias elementorum induimus personas. Ignem biliosus repræsentat, dum flammæ ad instar, inquietus hinc indeque ruit; dum, armorum bellicque amans, in obuio quosque fertur; exardescit continuo, in furias agitur. Aëris speciem exhibet sanguineus, dum, in omnibus temperatus, vitam in æuum iucundè placidèque protrahit. Pituitosum Neptuni imperio mancipatum somno alto quasi sepultum, aut aquis mersum dices. Infimæ denique sortis homo, melancholicus est, quem infimum & ignobilissimum elementum dominatur. Huius temperamentum, tum ad vitæ diuturnitatem, tum ad animi præstantiam, planè ineptum: ignauus est hebes, querulus, omnia tuta timet, mortem expetit quasi viuere impotens. Dicam compendio: frigidus est & siccus, hoc est, viuere quasi non viuat, vita enim in calido & humido sita est.

**M** ELANCHOLICVS non minùs corporis affectibus laborat quam mentis, hincque non minùs indiget Philosopho quam Medico. Ille optimis vtens philosophiæ præceptis, ignauum hortatur, mœrenz tem exultat, frustra meruentem confirmat. Hic medicamentis, optimoque rerum non naturalium vsu, ipsius emendat intemperiem, crassum humorem incidit, tetros arcet vapores, atque in eorum haret vt calefaciat & humectet. Aërem ergo querat melancholicus humidum quidem, sed paulò ad calidius vergentè; coctu facilia, bonique succi sumat alimenta: vino vtitur, sed parce nam imbecillum melancholicus calor ardore vini euictus marcescit, non secus ac maior flamma minorem extinguit illico: hinc fit vt post liberaliùs assumptum vinum, querantur, doceant, flectant impensè, expauescant, quasi imminentem ruinam præsentiant. Veneris vsus maximi hic est momenti, sed, si vsquam, hæc adhibenda præcautio: lubrica via hæc est: Venus melancholicis, præ cæteris omnibus, funesta est & amica: immoderata vbi imbecillum calorem diripit, humorem paucum admodum spiritumque exhaurit dissipatque, malum inuehit, pro dolor! immedicabile, facultatum exoluit robur, in ipsis trucidat incunabulis, primamque ipsorum ætatem facit vltimam. Moderata, dum crassum humorem attenuat, frigidam corporis emendat intemperiem, status discutit, agrestem animum lætitia miraque perfundit suauitate, sanitatem eam corpori conciliat, vt alium hominem, aliudque dices corporis temperamentum.

**D** EPONE hic, Cato, seueram frontem; veneris hæc sacra sunt suo cuique tempore celebranda: hæc rerum omnium & suauissima est, & potentissima. Vino quid potentius? Ipsa tamen bacchum inter priores subditos numerat. Heroe terra marique indomito, quid fortius? De ipso tamen ad veneris conspectum actum est, cedit vltro lubensque, sine viribus ad genua prouoluit, Reginam agnoscit. Vis plura? Cætera vincit omnia, Deum quoque vinceret si posset attingere. Hæc vna, inter res omnes, speciei simul & indiuidui studet conseruationi, dum, huic quondam tam liberaliter concessam vitam, iucundam facit, foelicem, diuturnam. Verum ipsius vis, nulquam elucet luculentius quam in melancholico: cæteros afficit quidem, sed leuius: illum ita immutat, vt ampliùs non appareat melancholicus; immò præ cæteris omnibus, audax, ingeniosus, hilaris: terrenus enim crassusque humor, vbi ignem concepit, feruentior efficitur. Quinetiam veneris melancholicorum ferè omnium morborum turba profigitur: intumescens calore vasis meatus liberantur, tolliturque foeliciter tam frequens & calamitosa ipsis obstructio: eodem calore, quasi aculeo, obeundis tarda muneribus excitantur viscera omnia: serum melancholicis adeo infensum exsiccatur, vaneſcit: spiritus crassi & nebulosi attenuantur, exhalantur; tandemque veneris ope vitam ingratam atque miseram, cum felici & suauissima, quasi denuò nascens, commutat melancholicus.

*Ergo Melancholicis Venus.*



*[Signature]*

Proponebat Lutetiæ RAPHAEL MAVRIN, Annotensis, A. R. S. H. M. DC. LVIII.